

Saturday, February 14, 2026

Time - 2:30pm - 2:35pm

AKASHVANI AIZAWL

REGIONAL NEWS UNIT

AIHM

Aizawl International Half Marathon chu tukin khan hlawhtling taka tlan a ni a, khawvel hmun hrang hrang atanga infiammi Aizawla lo kal bakah tualchhung mi te nen mi 3000 bawr vel an tlan a ni.

Aizawl International Half Marathon hi Rajiv Gandhi Stadium, Mualpui atangin an tlan tan a, Silaimualah kualin a hmun ngaiiah bawk an kir. Marathon vailiamtu Larsap Gen Retd VK Singh chuan, Maraton buatsaih tuten ngaihtuahna an seng thiam a tiin boruak nuam tak hnuaiah inelna neih a ni a ti a, hun lo kal zel turah pawh tun aia nasa zawk hian khawvel hmun hrana mite a la hip khawm ngei ang tiin a sawi.

(Byte : Governor)

AIHM curator Captain Rahul Bali chuan Akashvani Aizawl zawhna chhangin, Aizawl International Half Marathon hi tlang rama tlan (hill marathon) a nih avangin marathon dangte aini a danglam bik a ti a. Khawvel hmun hrang hrang atangin mi 3000 bawr an tel thu leh nikuma Aizawl International Half Marathon vawi 1-naah khan mi 1,500 vel an tel a; tunah chuan a hma aini a lian tawh zawk hle a, Kenya, Ethiopia, Bahrain, United Kingdom leh France ram atangte pawhin marathon-a tel tur an rawn kal a, hei hian Mizoram chu khawvel marathon lian huangah a hruai lut a ni, a ti.

Mizoram Sports Minister Pu Lalnghinglova Hmar pawhin a hmasa aini kuminah Marathon chuan ngaihhlut a hlawh zawk tih a sawi a, India mai bakah ram hran hran atang infiammi an lo kal thei chu lawmawm a tih thu sawiin, Mizoram chu khawvel huap inelna thleng tur pawhin a inpeih tih a entir niin a sawi bawk.

Mipa inelna KM 21 tlanah Kenya tlangval Kemboi Kevin Kiprono chu a chak ber a, ani hian ani hian darkar khat leh second ruk chhungin a tlan thleng a ni.



EDUCATION MINISTER

Education Minister Dr Vanlalhlana chuan MPSC Combined exam a hlawhtlina chang te chu Mizorama IAS awmte kawmngaih a, thawhhona tha tak neih pui turin a chah.

Nizan khan Dr. Vanlalhlana hian MS Academy atanga MPSC Combined Exam-a hlawhtlinna chang mi 14 te lawmpuina hun a hman pui a. Minister chuan, tling tharte chu Mizorama IAS awmte chu kawmngaih tur leh thawhhona tha neih pui turin a chah a, an let leh thleng a mi tangkai thei an nih avangin a pawimawh thu a sawi.

Minister chuan, sorkar hnathawk ni satliah lo a, sorkar fawng vuantute hnenah rawtna an neih ang te pawh sawi chhuak ngam tur in a chah a, uluk taka an lo ngaihthlak tur thu a sawi. Minister chuan- thawkrim leh thiam ngah te chu duhsak pawh an hlawh lo thei lo a, chutih laiin mahni in vawng zahawm turin hlawhtlinna chang thar te chu a chah bawk.

He huna khualzahawm MYC Chairman Pu Malsawmzuala Ralte chuan, vanram kaina dal tu chu hlawk viau dawnin lang mah se chatuan nun a tan a hlawk dawn loh avanga hnawl ngam turin a chah a. Sorkar hna chuan mawhphurhna lian pui a keng tel a, he hna an thawhna chhan tur ber chu mipuite rawngbawl a ni tih a sawi.

MA Academy atanga MPSC Combined Exam-a hlawhtling mi 14 te puala hun hmanah hian hlawhtlinna chang leh an chhungte bakah sawmbik te'n an hmang a ni.



VDAY BLOOD DONATION

South Tuipui Bialtu MLA Pu Jeje Lalpekhlua chuan vawiin inhmangaihma ni, Valentines Day a midangte hmangaihna lan chhuahtir a, blood donation camp buatsaih a ni chu lawmawm a tih thu a sawi.

Vawiin Association for Voluntary Blood Donation (AVBD), MSACS, NHM, KFC leh Civil Hospital, Aizawl-a Model Blood Bank te tangkawpin Dawrpui Multipurpose Hall, Aizawla Valentine's Day Blood Donation an buatsaih a hmanpuinaah he thu hi Pu Jeje Lalpekhlua chuan a sawi a. Midangte tana thisen pe a midangte tana luangchhuak thei nih chu thil lawmawm tak a nih thu a sawi a. Mizoram pawn hmun hrang hrangah awmin mi chi hrang hrang a chenpui thin thu leh chuta Mizo lo nawmna chu tlawmngaihna a nih thu a sawi a. Vawiina tlawmngaia thisen pe tura kalkhawm an tam zia a hmuhin Mizo nih chu nuam a tih zia leh vannei a intih zia a sawi a. Mi tam takin vawi tam tak thisen an pek theih chhan chu an hrisel vang leh an taksa an uluk vang a nih thu a sawi a. Thalaite chu hriselna vawng tha a, nun uluk turin a chah a ni.

He hunah hian Civil Hospital, Aizawl Blood Bank-a Sr. Medical Superintendent Dr. Lalchhuankimi pawhin thu sawiin thisen pek tangkai zia leh nghakhlel tu an tam zia hriat a pawimawh thu a sawi a. Thisen unit khat pawh a hlu tih sawiin unit khat, bag khat atangin component 4 ah chhuah a nih thu leh tangkai takin damlote mamawh dan hrang hrang milin siam thin a ni a ti a. Bag li bag nga ah siamin a mamawhtu ten an mamawh na chat chatah pek a ni a, a tangkai hle tih a sawi a ni. Thisen pek sa a awm chuan rikrum thilah a tangkai hle tih a sawi bawk a ni.

Chanchin buatsaih lai hian mi 200 velin thisen an pe tawh a, tlailam thleng thisen hi pek theih a ni dawn a ni.



CYLA

Nimin khan Central Young Lai Association hruaitute chuan Lai Autonomous District Council leh Chakma Autonomous District Council inrinna lai ni a an hriatah Ramri lung an phun.

Ramri lung an phunna hi Parva-I bul a Lei bul ah niin, Central YLA hruaitute hi an President Pu F. Lalrothanga'n a ho a, Central YLA President chuan Pi leh Pute hunlai atang tawhin LADC leh CADC inrina chu Khuavang ramri khamisa, Tuichawnglui chu hman a ni tih sawiin, Parva-I bulah hian Ramri chhinchhiah nan Lung an phun niin a sawi a, a venhimhna leh vilzui hna chu helai chhehvel a Branch YLA leh Vathuampui Group YLA te kutah thuitak a inngahthu a sawi. Pu F. Lalrothanga chuan Ramri lung an phun chu boruak duhawm lo hringchhuak theitur hawi zawng a nilo niin a sawi a, Ramri chu a nihdan tura chhinchhiahna a awmlah chuan thil fello inzepthei a awm vanga Ramri lung chu phun an nih thu a sawi.

Ramri Lung phunna ah hian Central YLA hruaitute bak ah Vathuampui Group YLA hruaitute, Parva leh a chhehvel a Branch YLA hruaitute an tel.

